

30. oktober 2009

UKA 2009/116

**Erngup nukingata innaallagissionermut atorneqartarnera pillugu Inatsisartut
inatsisissaattut siunnersuut**
(Ineqarnermut, Attaveqarnermut Angallanermullu Naalakkersuisoq)

pillugu

Ineqarnermut Attaveqarnermullu Ataatsimiititaliap

ISUMALIUTISSIISSUTAA

Inatsisissatut siunnersuut aappassaaneerreqarnerani saqqummiunneqartoq

Ataatsimiititaliaq kingullermik suliarinninnermini ukuningga inuttaqarpoq:

Inatsisartunut ilaasortaq Justus Hansen, Demokraatit, siulittaasoq
Inatsisartunut ilaasortaq, Olga P. Berthelsen, Inuit Ataqtigiit, siulittaasup tullia
Inatsisartunut ilaasortaq Anders Olsen, Inuit Ataqtigiit
Inatsisartunut ilaasortaq Kim Kielsen, Siumut,
Inatsisartunut ilaasortaq Ruth Heilmann, Siumut, sinniisussaq

Ulloq 6. oktober 2009-mi siullermeerinerup kingorna ataatsimiititaliap siunnersuut
erseqqinnerusumik naliliiffigaa, imalu oqaaseqaateqarniarluni:

Siunnersuummut tunuliaqutaasut

Ukiuni kingullerni pinngortitami isumalluutitta aningaasaqarnikkut imminut
napatissinnaaneq anguniarlugu inuussutissarsiutinik ineriartortitsinermut
atorluarneqarnissaat annertusiartortumik siunnerfigineqarsimasoq siunnersuuteqartoq
siunnersuummut nassuiaatini aallarniutigalugu allappoq. Siusinnerusukkut
aatsitassanik misissueqqaarnissamut piaanissamullu tunngavissanik
pilersitsisoqartarsimasoq, taamatullu innuttaasunut inuiaqatigiillu

anigaasaqarnerannut iluaqutaasumik erngup nukinganik isumalluutininik tunngaveqarluni suliffissuarnik ineriartortitsinissamat inatsisissatut siunnersuummi matumani tunngavissiisoqartoq siunnersuuteqartup aamma paasissutissiissutigaa.

Tamanna tunngavigalugu erngup nukingata innaallagissiornermut atorneqartarnera pillugu Inatsisartut inatsisissaannik siunnersuusiortoqarpoq. Siunnersuutip atuutilerneratigut Kalaallit Nunaanni nukissiornermut isumalluutissat mingutsitsiviunngitsut niuernerpalaartumik atorluarneqarnissaannut killissarititaasut pilersinneqassasut, avataaniit aningaasaliisoqarsinnaanera ammaanneqassasoq aammalu inuussutissarsiutinik nungusaataanningsunik tunngaveqartunik nutaanik pilersitsinissaq ammaanneqassasoq siunnersuuteqartoq isumaqarpoq. Tamatuma peqatigisaanik siunnersuutip atuutilerneratigut Namminersorlutik Oqartussat erngup nukinganik isumalluutininik aamma erngup nukinganik innaallagissiorfinnik siunissamat ungasissumut atuisinnaanissaat, piffissamat killilikkamik akuersissutitigut aamma erngup nukinganik innaallagissiorfiit akeqanngitsumik Namminersorlutik Oqartussanut tunniunneqarsinnaanerisigut qulakkeerneqassasoq siunnersuuteqartoq aamma isumaqarpoq.

Killiliussatut inatsit pineqarmat suliassaqaarfik pillugu maleruagassat erseqqinnerusut pilersikkumallugit Naalakkersuisut nalunaarutinik arlalinnik suliaqarnertik ingerlakkaat siunnersuuteqartup erseqqissaatigaa.

Tusarniaanermi akissutit

Siunnersuutip ataatsimiititaliami sularineqarnerani atugassatut tusarniaanermut akissutit nuutinneri ataatsimiititaliap piniarpai. Tusarniaaneriit marluk ingerlanneqarsimapput, taakkulu pillugit allakkianik ataatsimiititaliaq tigusaqarpoq.

Siunnersuummik sularinninneq

Inatsisartuni siullermeerineri siunnersuut ilalernerqarluartoq ataatsimiititaliamit maluginiarneqarlunilu paasineqarpoq siunnersuut matumani pineqartoq assut isumaqatigiissutaasoq.

Pissutsit marluk Inatsisartut immikkoortumik sularinninneranni immikkut sammeneqartut ataatsimiititaliap maluginiarpaa.

Siullermik pisinnaatitaaffimmik pigisaqartup illoqarfinni qanittuni inuiaqatigiinnut nukimmik pilersuinissamat pisussaaffilerneqarsinnaaneranut apeqqut aappaattullu aningaasanut inatsiseqarfiusumi 2010-mi aningaasanut inatsisissatut siunnersuummi erngup nukinganik misissueqqaarnernut (konto pingaarneq 73.95.02) aningaasaliissutaasut nassatarisaannik nunatta avannaani erngup nukinganik nukissiorfiliornissamik pilersaarutit ukiunik qulinik kinguaattoornissaannik oqaatigineqartut pillugit apeqqut.

Apeqqummut siullermut tunngatillugu apeqqu taanna siunnersuummi aalajangersakkat ataasiakkaat nassuiaataanni tamakkiisumik akineqartoq ataatsimiititaliaq isumaqarpoq.

Apeqqutip aappaanut tunngatillugu Ineqarnermut, Attaveqarnermut Angallanermullu Naalakkersuisumik ataatsimiititaliap ataatsimeeqateqarnerani 2010-mi aningaasanut inatsimmut aningaasaliissutit kingunerisaannik erngup nukinganik nukissiorfiliornissamik pilersaarutit ukiunik qulinik kinguartoornissaannik oqaatiginninneq ilisarisinnaanngikkini Naalakkersuisunut ilaasortap ataatsimiititaliamut paasissutissiissutigaa. Kontomut pingaarnermut taaneqartumut aningaasaliissutit immikkoortinneqartut 2009-mi aningaasanut inatsimmi qaffariaateqartut, qaffariarnerlu taanna 2010-mi aningaasanut inatsisissatut siunnersuummi ukiunilu missingersuusiorfinni aalajangiusimaneqartoq Naalakkersuisunut ilaasortap paasissutissiissutigaa. Taamaattumillu siunnersuummut ataatsimiititaliap tapersiinerata allanngortinnissaanut ataatsimiinneq pissutissaqalersitsinngilaq.

Tamanna tunngavigalugu **ataatsimiititaliap isumaqatigiittup** siunnersuut Inatsisartunit akuersissutigineqassasoq inassutigaa.

Taama oqaaseqarluni Ineqarnermut Attaveqarnermullu Ataatsimiititaliap inatsisissatut siunnersuut Inatsisartunut aappasaaniigassanngortippaa.

Justus Hansen,
Siulittaasoq

Demokraatit

Olga P. Berthelsen,
Siulittaasup tullia

Anders Olsen

Inuit Ataqatigiit

Inuit Ataqatigiit

Kim Kielsen,

Ruth Heilmann,

Siumut

Siumut